

## आकाशवाणी जयपुर-अजमेर

दिनांक 25.07.2024 समय: 18.45 बजे

- प्रधानमंत्री नरेंद्र मोदी कारगिल विजय दिवस री 25वीं वर्षगांठ रे मौके काल कारगिल युद्ध स्मारक रो दौरा करेला।
- देश मांय लारला दस साल मांय बिजली बणावण रा बूता मांय करीब 80 फीसदी री बधोतरी व्ही।
- विधानसभा मांय कांग्रेस रा विधायक श्रवण कुमार री साधु-संतां रा बारा मांय कही ज्यीबात माथे आज ज़ोरदार हंगामो व्ह्यो। अर
- प्रदेश मांय केई ठौड़ां चोखी बिरखा व्ही- मौसम विभाग रे मुजब आवता दिनां ई चौमासा री बिरखा चालती व्हेवण रा आसार।

000

25वां कारगिल दिवस रे मौके काल प्रधानमंत्री नरेन्द्र मोदी कारगिल युद्ध स्मारक रो दौरा कर र देश सारू जान कुर्बान करण वाळा शहीद जवानां ने श्रद्धांजलि देवेला। प्रधानमंत्री शिनकुन ला सुरंग बणावण रा काम री ई वर्चुअल तरीका ऊं सरूआत करेला। चार किलोमीटर ऊं बत्ती लंबी आ सुरंग लेह ने हर हाल मांय देश रा दूजा हलकां ऊं जुड़ी राखेला। करीब 15 हजार 800 फीट री ऊंचाई माथे बणायी जावण वाळी सुरंग दुनिया री सब ऊं ऊंची सुरंग व्हेला। कारगिल री लड़ाई मांय जीत रा 25 साल पूरा व्हेवण रा सिलसिला मांय वीर फौजियां रा मान मांय प्रदेश मांय ई न्यारा-न्यारा कार्यक्रम राख्या जा रह्या है। जैसलमेर रा बरमसर मांय निबंध होड राखी ज्यी। ई दौरान गांव रा पैली वाळा फौजी पवनसिंह अर सुमेरसिंह रो मान करी ज्यो। ई मौके बरमसर री स्कूल मांय पौधा रोपी ज्यो। आं पौधां री क्यारी रो नाम कारगिल वाटिका राखी ज्यो। अजमेर मांय ई आज सिंज्यां मशाल जुलूस निकाळ्यो जावेला। ई पाछे शहीद स्मारक माथे शहीदां री याद मांय 24 घंटा तांई अखंड ज्योत जळाई जावेला। काल कारगिल विजय दिवस रे मौके भरतपुर रा लोहागढ स्टेडियम रा शहीद स्मारक माथे वीर फौजियां ने श्रद्धांजलि दी जावेला अर वीरांगनावां रो मान कर्यो जावेला।

000

देश सारू प्राण निछावर करण वाळा फौज रा सूबेदार सवाई सिंह तंवर री मूरत रो आज नीम का थाना जिला रा बलमदासपुरा गांव मांय अनावरण करी ज्यो। सैनिक कल्याण बोर्ड रा अध्यक्ष प्रेम सिंह बाजोर अर कर्नल अजय शर्मा वां री मूरत रे अनावरण कीनो। कार्यक्रम रे दौरान सूबेदार सवाई सिंह रा पिरवार वाळां रो ई मान करी ज्यो। सूबेदार सवाई सिंह तंवर साल 1971 मांय भारत अर पाकिस्तान बीचे व्ही लड़ाई मांय वीरगति हासिल कीनी ही। वे बांग्लादेश री सरहद माथे देश री हिफाजत करण रे दौरान प्राण निछावर कर दीना हा।

000

देश मांय लारला दस साल मांय बिजली बणावण रा बूता मांय करीब अस्सी फीसदी री बधोतरी व्ही है। ऊर्जा राज्यमंत्री श्रीपद नाइक लोकसभा मांय आज एक सवाल रा लिखित जवाब मांय आ जाणकारी दीनी। वे बतायो के कोयला आधारित बिजली उत्पादन क्षमता काल 2014 मांय एक लाख 39 हजार छह सौ 63 मेगावॉट ऊं बध र अब दो लाख दस हजार नौ सौ 69 मेगावॉट व्हे ग्यी है। नवीकरणीय उर्जा पैदा करण रो बूतो ई 75 हजार पांच सौ 19 मेगावॉट ऊं बध र एक लाख 95 हजार मेगावॉट ऊं बत्तो व्हे ग्यो है।

सूरजगढ़ ऊं कांग्रेस रा विधायक श्रवण कुमार री साधु-संतां रा बारा मांय कही ज्यी बात माथे विधानसभा मांय आज जोरदार हंगामो व्ह्यो। श्रवण कुमार काल पशुपालन विभाग री अनुदान मांगां माथे चर्चा रे दौरान बाबावां रा बारा मांय सदन मांय बयान दीनो हो। सदन मांय आज भोजनावकाश पाछे मुख्य सचेतक जोगेश्वर गर्ग ओ मामलो उठाता थकां कह्यो के विधायक रा बयान ऊं सगळा ने दुख व्ह्यो है अर वां ने माफी मांगणी चाहिजे। तिजारा रा विधायक बाबा बालकनाथ कांग्रेस माथे सनातन संस्कृति रो अपमान करण रो आरोप माण्ड्यो। ई पाछे पख अर विपख रा सदस्यां बीचे व्ही बहस अर हंगामा ने देखता थकां विधानसभा री कार्यवाही थोड़ी देर सारू टालणी पड़ी। कार्रवाई ओजू सरू व्हेवण परां स्पीकर वासुदेव देवनानी श्रवण कुमार री टिप्पणी ने सदन री कार्यवाही ऊं हटावण अर विधायक श्रवण कुमार ने आगे ऐड़ा शब्द काम नी लेवण रा हुकम दीना। सहकारिता विभाग री मांगां माथे चर्चा रे दौरान श्रवण कुमार बोल रह्या हा तो भाजपा रा विधायक वां रा बयान माथे ओजू हंगामो कीनो।

000

कानून मंत्री जोगाराम पटेल आज विधानसभा मांय भरोसो दिरायो के राज्य सरकार भीम विधानसभा हलका रा देवगढ़ मांय कैम्प कोर्ट खोलण रा बारा मांय विचार कर रही है। वे साफ कीनो के मुकदमां री जरूरी तादाद नी व्हेवण रे कारण देवगढ़ मांय अतिरिक्त जिला न्यायालय खोलण रो कोई प्रस्ताव नी है। पटेल प्रश्नकाल रे दौरान सदस्यां रा सवालां रो जवाब देता थकां आ जाणकारी दीनी।

00

मगरा क्षेत्र विकास योजना रा तैत चित्तौड़गढ़ विधानसभा हलका सारू 60 लाख रुपया रा प्रस्ताव मंजूर करी ज्या है। ग्रामीण विकास राज्य मंत्री ओटाराम देवासी आज विधानसभा मांय आ जाणकारी दीनी। वे भरोसो दिरायो के तैय मापदंड पूरा करण परां चित्तौड़गढ़ विधानसभा मांय मगरा क्षेत्र विकास योजना रा तहत नुवा गांव जोड़बा माथे विचार कर्यो जावेला। मंत्री प्रश्नकाल रे दौरान बतायो के मगरा क्षेत्र विकास योजना रा तैत आवण वाळा ब्यावर, भीलवाड़ा, चित्तौड़गढ़, पाली अर राजसमन्द जिलां ने हाल ताई 38 करोड़ 97 लाख रुपया दिया ज्या है।

000

प्रदेश मांय केई ठौड़ां आज ई चोखी बिरखा व्ही। झालावाड़ मांय रुक-रुक र बिरखा व्हेती रही। राजधानी जयपुर मांय ई दोपहरां पाछे हल्की बरसात व्ही। कोटा मांय आज करीब 2 घंटा ताई बरस्या जोरदार मेह रे कारण नीचला हलकां मांय पाणी भर ग्यो। रामगंजमंडी उपखंड रा चेचट थाना हलका रा देवली गांव मांय एक घर माथे बिजली रा तार पड़ जावण रे कारण आया करंट ऊं एक ही पिरवार री दो महिलावां री मौत व्हे ग्यी। चित्तौड़गढ़ जिला मांय ई आज करीब एक घंटा ताई जोरदार बिरखा व्ही। बूंदी जिला रा नैनवा मांय 119 मिलीमीटर बरसात व्ही। पाली मांय बादळा मण्ड्या रह्या। प्रदेश मांय केई ठौड़ां हल्की ऊं मझला दर्जा री बिरखा रा समाचार है। मौसम विभाग रे मुजब मॉनसून री ट्रफ लाइन आज श्रीगंगानगर, जयपुर व्हेती निकळ रही है, जिण रा असर ऊं आज उदयपुर, कोटा अर अजमेर संभाग रा कुछ हलकां मांय कठे-कठे जोरदार बिरखा व्हेवण रा आसार है। मौसम केंद्र जयपुर रा निदेशक राधेश्याम शर्मा बतायो के राज्य मांय आवता दिनां ई चौमासा री बिरखा चालती रेहवण री संभावना है।

000

रेलवे एक उत्पाद

रेल मंत्रालय एक स्टेशन एक उत्पाद योजना रा तहत कोटा रेलवे टेशन रा प्लेटफॉर्म नम्बर 2 माथे कोटा डोरिया साडी अर सूट री स्टॉल लगायी है। हाल ताई कोटा टेशन माथे कोटा डोरिया साडी री केवल एक स्टॉल प्लेटफॉर्म नम्बर एक माथे खोली ज्यी ही। मुसाफिरां कानी ऊं लगातार खरीदी करण ने ध्यान राखता थकां एक और स्टॉल प्लेटफॉर्म नम्बर 2 माथे खोली ज्यी है।

000

दीक्षान्त समारोह

जयपुर रा जगद्गुरु रामानंदाचार्य राजस्थान संस्कृत विश्वविद्यालय रो छठो दीक्षान्त समारोह 27 जुलाई ने राख्यो जावेला। विश्वविद्यालय परिसर मांय व्हेवण वाळा ई जळसा मांय 27 जणां ने पीएच.डी. अर 12 विद्यार्थियां ने सोना रा तमगा दे र नवाजा जावेला। विश्वविद्यालय रा कुलपति प्रो. रामसेवक दुबे खबरनवीसा सागे बातचीत करता थकां बतायो के जळसा मांय राज्यपाल कलराज मिश्र ई सिरकत करेला अर कार्यक्रम रा खास पावणा पद्मविभूषण ऊं नवाजी ज्या जगद्गुरु रामभद्राचार्य व्हेला।

.....

0000

डीग जिला रा कामां हलका मांय काल कामां उत्सव सरू व्हेला। दो दिन रा ई उत्सव रा पैला दिन गोकुल चन्द्रमा जी, मदन मोहन जी अर गोपीनाथ जी मिंदर मांय शहनाई बजावण, मेहंदी, रंगोली, चित्रकला, राधा कृष्ण अर महापुरुष पोशाक होडां राख्यी जावेला। 27 अगस्त ने श्री कृष्ण जन्मोत्सव मणायो जावेला। जिला कलेक्टर श्रुति भारद्वाज बतायो के गोकुल चन्द्रमा जी, श्री मदन मोहन जी अर गोपीनाथ जी मिंदर ऊं रामलीला मैदान कोट ऊपर ताई कृष्ण दल, राधा दल लोक कलाकारां री मंडलियां सागे शोभायात्रा निकाली जावेला। सिंज्या री पोर मटकी फोडबा री होड राख्यी जावेला अर सांस्कृतिक कार्यक्रम व्हेला।

000

बूंदी रा अतिरिक्त जिला कलेक्टर घनश्याम शर्मा गुढानाथावतान मांय रात्रि चौपाल लगा र जनता री समस्यावां सुणी। वे रात्रि चौपाल के दौरान 40 ऊं बत्ती समस्यावां माथे विचार कर र अहलकारां ने जरूरी कार्रवायी करण रा हुकम दीना। हनुमानगढ़ जिला रा ललाना बास उतराधा मांय लगायी ज्यी रात्रि चौपाल मांय जिला कलेक्टर काना राम जनता री बिजली, पाणी अर शिक्षा संबंधी समस्यावां सुणी अर अहलकारां ने जरूरी हुकम दीना।

000